

CONVENIO DE COLABORACIÓN ENTRE A AXENCIA TURISMO DE GALICIA E A ASOCIACIÓN CLÚSTER EMPRESARIAL DE TURISMO DE GALICIA (CTG) PARA A ELABORACIÓN DO PLAN DIRECTOR DO TURISMO DE GALICIA FRONTE AOS EFECTOS DA COVID-19

REUNIDOS

Por unha parte, D. Alfonso Rueda Valenzuela, vicepresidente primeiro e conselleiro de Presidencia, Xustiza e Turismo, en representación da **Axencia de Turismo de Galicia**, en calidade de presidente, segundo se establece na Disposición adicional novena do Decreto 130/2020, do 17 de setembro (DOG núm. 190, do 18 de setembro), e de conformidade coa atribución do artigo 15.2.c) dos estatutos da Axencia Turismo de Galicia, aprobados polo Decreto 196/2012, do 27 de setembro (DOG núm. 193, do 9 de outubro).

Por outra parte, D. Cesáreo González Pardal, en calidade de Presidente da **Asociación Clúster Empresarial de Turismo de Galicia** (en adiante, CTG), con CIF G70377338, e domicilio a efectos de notificacións no Edificio Centro Emprendimento (Coworking) Cidade da Cultura de Galicia Monte Gaias, s/n 15707, Santiago, elixido para o devandito cargo por elección realizada no seo da Asemblea Xeral Extraordinaria do CTG do 1 de outubro de 2018, e actuando en virtude das facultades que lle outorga o artigo 19 dos estatutos da entidade.

Interveñen en función dos seus respectivos cargos e no exercicio das facultades que, para convir en nome das entidades que representan, teñen conferidas e,



EXPOÑEN

Primeiro.- Que a Axencia Turismo de Galicia, en virtude do disposto no artigo 9 dos seus Estatutos, aprobados polo Decreto 196/2012, do 27 de setembro, polo que se crea a Axencia Turismo de Galicia e se aproban os seus estatutos, é a entidade da Xunta de Galicia ao que lle corresponde o exercicio, entre outras, das competencias en materia de fomento e competitividade do turismo.

Segundo.- Que a asociación sen ánimo de lucro CTG, constituída o 20 de xuño de 2013, é a única entidade en Galicia que agrupa e representa a toda a cadea de valor do sector turístico de Galicia, cuxa finalidade é a representación, defensa e difusión dos intereses comúns dos seus membros, o fomento das actividades principais ou nucleares da cadea de valor do turismo (actividades de apoio, actividades centradas no subministro e actividades centradas no equipamento) así como o incremento da competitividade do sector turístico para o cal realizará cantas accións estime necesarias, promovendo e impulsando a interacción dos distintos axentes co fin de dinamizar e fomentar as relacións entre eles, proporcionando unha plataforma de encontro axeitada para poder cumprilo reto de desenvolver o sector do turismo en Galicia.

Terceiro.- Que no presente ano 2020 finaliza o período de execución da vixente Estratexia de Turismo de Galicia. Ás portas do Xacobeo 2021 e tras anos de crecemento constante do sector turístico galego, con cifras récord en termos de demanda, era o momento de deseñar un novo Plan Estratéxico de Turismo de Galicia, co Xacobeo 2027 e/ou o ano 2030 no horizonte, así como un novo Plan Director do Camiño de Santiago.

A aparición da COVID-19 non anula a necesidade de planificar unha Estratexia, que segue sendo imprescindible, idea reforzada coa súa inclusión como medida no Plan de reactivación dos sectores cultural e turístico fronte aos efectos derivados da COVID-19, se ben obriga a reformular cuestións como os obxectivos, prioridades ou horizonte temporal.



Nestes intres é preciso afondar nas necesidades a curto prazo do sector, de cara a elaborar unha folla de ruta que permita a Galicia como destino e, por suposto, ás empresas turísticas galegas, superar a crise económica e situarse en posicións de vangarda de cara á posterior recuperación.

O Plan Director do Turismo de Galicia fronte aos efectos da COVID-19 ten como obxectivo a definición dunha serie de medidas estratéxicas e operativas que permitan superar a crise multidimensional provocada pola COVID-19, reactivando o sector turístico e aproveitando a conxuntura para reposicionar a Galicia como destino. O plan debe preparar a transición cara os anos de recuperación, onde se definiría unha nova Estratexia de Turismo co 2027 ou o 2030 como posibles metas temporais, nun período con varios Anos Santos e coa sustentabilidade como eixo irrenunciable.

O plan elaborárase co seguinte enfoque metodolóxico:

- Enfoque científico, coa participación das tres universidades galegas, fórmula de probado éxito na elaboración da vixente Estratexia 2020.
- Diagnose participativa. O CTG coordinará o traballo de campo co sector turístico, de cara a recoller as súas necesidades e expectativas e validar o labor previo das universidades.
- Plan Estratéxico e Operativo. Propostas para reactivar o turismo en 2021, co pulo do Xacobeo 2021, e ata que finalice a actual situación epidemiolóxica. Aproveitamento do financiamento europeo para impulsar proxectos tractores. Fortalecemento e reposicionamento de Galicia como destino turístico a curto prazo, e en especial como destino seguro
- Indicadores de destino a curto prazo.

Cuarto.- Que a Axencia Turismo de Galicia, para fomentar a colaboración público privada na consecución destes fins comúns, considera conveniente convir co CTG. As liñas de



colaboración entre a Axencia Turismo de Galicia e o Clúster de Turismo de Galicia para dar cumprimento ao obxecto deste convenio é a seguinte: ***Deseño e elaboración do Plan Director do Turismo de Galicia fronte aos efectos da COVID-19.***

Polo exposto a colaboración entre as partes responde ao interese común das mesmas, de reactivación do sector turístico tan afectado pola crise xerada pola evolución epidemiolóxica da COVID-19 que provocou unha parálise total do citado sector, motivo polo que a Axencia Turismo de Galicia considera axeitado e necesario, por razóns de interese público, colaborar co Clúster para o desenvolvemento do programa antes referido, por ser a única entidade que representa a toda a cadea de valor do sector turístico de Galicia, e polo tanto a única entidade que pode desenvolver o seu obxecto e lograr acadar o seu obxectivo.

En consecuencia ambas partes acordan a formalización dun convenio de colaboración de acordo coas seguintes,

CLÁUSULAS

Primeira.- Obxecto

O obxecto do presente convenio é definir as liñas básicas da colaboración público-privada co CTG para o deseño, elaboración e redacción do *Plan Director do Turismo de Galicia fronte aos efectos da COVID-19.*

Segunda.- Orzamento e financiamento

O orzamento estimado para o desenvolvemento das actuacións obxecto deste convenio é de 65.000,00€ (IVE incluído), e co desagregamento que se establece no Anexo I a este convenio do que forma parte integrante.

A Axencia Turismo de Galicia alcanzará o 100%, isto é 65.000,00 € (IVE incluído) con cargo á aplicación orzamentaria 11.A2.761A.640.0 dos seus orzamentos para 2020.



A achega que fai a Axencia Turismo de Galicia para posibilitar a realización das actuacións será dedicada aos gastos de execución do proxecto, e só cubrirá o custo de realización da actividade sen que o CTG obteña beneficio ou lucro industrial algún con dita achega.

O IVE só será gasto que se poida imputar ao presente convenio na proporción deste que non resulte compensable nin se poida repercutir polo CTG, o que será axeitadamente xustificado pola entidade beneficiaria no momento de presentar a documentación xustificativa establecida na cláusula cuarta.

Terceira.- Compromisos das partes

I. O CTG comprometese a:

1. Entregar á Axencia Turismo de Galicia unha memoria das actividades realizadas, así como o documento do Plan Director do Turismo de Galicia fronte aos efectos da COVID-19, en formato papel e dixital, así como todos os documentos e audiovisuais creados durante a súa elaboración (fotos/vídeos de presentación, mesas de participación,)
2. Executar o orzamento convido.
3. Facer constar a cooperación da Xunta de Galicia en toda a información que se difunda sobre as actuacións, tanto nos medios de comunicación como no material informativo que se puidera distribuír.
4. Incluír a marca Xacobeo 2021, de acordo co manual de identidade visual, aprobado polo Decreto 167/2018, do 29 de novembro, polo que se regula a utilización da marca Xacobeo 2021 (DOG núm. 1, do 2 de xaneiro de 2019).
5. - Subministrar á Axencia Turismo de Galicia, en virtude do disposto no artigo 4 da Lei 1/2016, do 18 de xaneiro, de transparencia e bo goberno, previo requirimento, toda a información necesaria para o cumprimento pola Axencia Turismo de Galicia, das obrigas previstas no Título I da citada lei.”



II. A Axencia Turismo de Galicia comprométese, pola súa banda, a colaborar co CTG para a mellor consecución dos fins comúns deste convenio, e en particular mediante as seguintes actividades:

1. Apoio técnico e profesional nos protocolos de traballo, información e funcionamento que deseñe o CTG para a implementación das actividades.
2. Apoio na procura de instalacións para manter as xuntanzas e mesas de participación do sector turístico.
3. A Axencia Turismo de Galicia procederá ao pagamento dos gastos correspondentes a este convenio, unha vez que esta entidade achegue a documentación xustificativa establecida na seguinte cláusula.

Cuarta.- Xustificación de fondos e pagamento

1. A achega prevista na cláusula segunda será librada pola Axencia Turismo de Galicia previa presentación da xustificación da execución das actuacións desenvolvidas, a través da seguinte documentación:

- a) Memoria explicativa das actividades realizadas, tal como se detalla na cláusula anterior.
- b) Facturas xustificativas dos gastos efectuados xunto coas transferencias bancarias ou outra documentación acreditativa do seu pagamento.
- c) No suposto de gastos realizados con medios ou recursos propios, documentos acreditativos dos gastos realizados e a indicación, no seu caso, dos criterios de reparto dos custes xerais e/ou indirectos incorporados na relación a que se fai referencia na primeira alínea a).
- d) Certificación de estar ao corrente das súas obrigas tributarias e da seguridade social e de non ter pendente débedas por ningún concepto coa Xunta de Galicia.



e) Indicación do número de conta para realizar o pagamento xunto coa declaración responsable sobre a súa titularidade.

A Axencia Turismo de Galicia resérvase o dereito a solicitar toda a documentación que considere precisa en relación coa xustificación do convenio.

Con carácter xeral, considéranse gastos imputables ao presente convenio aqueles que de xeito indubitado responden á natureza das actividades obxecto do mesmo.

2. O prazo para a presentación da citada documentación xustificativa remata o **15 de decembro de 2020**.

A documentación correspondente á xustificación presentarase de forma electrónica a través da sede electrónica da Xunta de Galicia (<http://sede.xunta.gal>).

3. Á vista desta documentación, o órgano competente da Axencia Turismo de Galicia, expedirá certificación acreditativa do cumprimento dos fins obxecto do convenio e tramitará o seu pagamento.

En todo caso, a cantidade máxima que se obriga a aportar a Axencia, reducirase na mesma proporción que represente a cantidade xustificada respecto do orzamento total previsto na cláusula segunda.

Non se entenderá incumprida a obriga de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado na cláusula segunda, cando obedezan a razóns xustificadas e as actuacións que se levan a cabo garden relación directa co obxecto do presente convenio.



Quinta.- Resultados conxuntos.

Os resultados obtidos como consecuencia da colaboración obxecto deste convenio serán propiedade conxunta, a partes iguais, da Axencia Turismo de Galicia e do CTG na medida que os resultados sexan susceptibles de protección mediante o réxime da propiedade intelectual, e seralles de aplicación o disposto no art. 7 do Texto Refundido da Propiedade Intelectual, aprobado polo Real Decreto Legislativo 1/1996, do 12 de abril, polo que se aproba o texto refundido da Lei de propiedade intelectual, regularizando, aclarando e harmonizando as disposicións legais vixentes sobre a materia, relativo á obra en colaboración.

Calquera modificación dos resultados deberá ser autorizada por ambas as dúas partes, non obstante a Axencia Turismo de Galicia, no cumprimento dos seus fins institucionais, poderá utilizar libre e gratuitamente os traballos de campo, datos de todo tipo, resultados, análises, informes e conclusións que se deriven das actuacións obxecto do convenio. En todo caso, nas accións de difusión de datos e informes obtidos pola execución destas accións farase sempre referencia ao presente convenio.

Sexta.- Dirección técnica, medios humanos e materiais

O CTG, como entidade executora das actuacións recollidas no presente convenio, co obxecto de garantir a adecuada execución das mesmas, comprométese a asumir a dirección técnica, debendo proceder en consecuencia, á asignación dos medios humanos e materiais que sexan necesarios e, no seu caso, á subcontratación de servizos necesarios para desenvolver as actuacións previstas no presente convenio, podendo subcontratar **totalmente as actividades previstas.**

En todo caso quedan fóra da subcontratación aqueles gastos nos que teña que incurrir CTG para a realización por si mesma da actividade obxecto deste convenio.

A necesidade da subcontratación estará debidamente motivada pola entidade beneficiaria



e, en ningún caso, suporá un aumento do custo das actividades.

Os subcontratistas quedarán obrigados soamente ante CTG, que asumirá a total responsabilidade da execución da actividade subvencionada fronte á administración. O CTG será a responsable de que na execución da actividade concertada con terceiros se respecten os límites establecidos neste convenio en canto á natureza e contía dos gastos e esixiranlles ás/aos subcontratistas os documentos acreditativos dos pagamentos correspondentes. Os subcontratistas están obrigadas/os a lles facilitar aos organismos de auditoría e control toda a información necesaria relativa ás accións subcontratadas.

Na contratación das actividades que faga o CTG, este debe axustarse á Lei 9/2017, do 8 de novembro, de contratos do sector público, no relativo a criterios de obxectividade e concorrência e cumprindo os requisitos esixidos na Lei.

A subscrición deste convenio non implicará relación laboral, ou de calquera outra natureza, entre as partes e as persoas ou profesionais que desenvolvan as accións que constitúen o obxecto deste convenio coa a Axencia Turismo de Galicia de tal xeito que, por este concepto, non se lle poderá esixir a mencionada entidade responsabilidade ningunha, nin directa nin subsidiaria.

Sétima.- Comisión mixta de seguimento

Para o seguimento do convenio e da súa execución créase unha Comisión de Seguimento, que estará integrada por tres representantes designados por cada unha das partes asinantes. A comisión será a competente para decidir calquera cuestión sobre a interpretación ou execución do presente convenio.

A súa actuación axustarase ao establecido na Lei 40/2015, do 1 de outubro, do Réxime Xurídico do Sector Público, e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.



As cuestións litixiosas que poidan xurdir coa interpretación, resolución e efectos do presente convenio serán resoltas pola comisión de seguimento, e en última instancia dirimiranse na xurisdición contencioso-administrativa.

Oitava.- Modificación e resolución do convenio

1. As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

Así mesmo, e de conformidade co disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira.

2. Serán causas de resolución deste convenio:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- O acordo unánime de todos os asinantes.
- A decisión xudicial declarativa da nulidade do convenio.

Novena.- Publicidade e rexistro do convenio e autorización e consentimento para que se publiquen os datos persoais e demais especificacións que figuran no convenio.

O réxime de publicidade do convenio será o establecido na Lei 1/2016, do 18 de xaneiro, de transparencia e bo goberno. A sinatura do convenio leva implícita a autorización para



o tratamento necesario dos datos e a referida publicidade, incluída tamén a publicidade no Portal de Transparencia e Goberno Aberto.

Segundo o artigo 15 da Lei 1/2016, de 18 de xaneiro, ademais da información que debe facerse pública segundo a normativa básica en materia de transparencia, a Axencia Turismo de Galicia publicará o texto íntegro do convenio.

Asemade procederase a inscrición do convenio no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

Coa sinatura do presente convenio as partes asinantes prestan o seu consentimento para incluír e facer públicos a través do Portal de Transparencia e Goberno Aberto e do rexistro regulado no Decreto 126/2006, do 20 de xullo, os datos de carácter persoal e mailo resto de especificacións contidas no convenio.

Décima .- Natureza xurídica, réxime e xurisdición competente

O presente convenio de colaboración formalízase ao abeiro do disposto na resolución de 8 de abril de 1991 pola que se fai público a acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e con particulares.

Este convenio ten natureza administrativa e queda fóra do ámbito de aplicación da lexislación de contratos das Administracións públicas, segundo dispón o artigo 6.2 da Lei 9/2017, do 8 de novembro, de contratos do sector público, sen prexuízo da aplicación dos principios da citada Lei para resolver as dúbidas e lagoas que puideran presentarse.

Seralle de aplicación o réxime determinado na Lei 39/2015, do 1 de outubro, do Procedemento Administrativo Común das Administracións Públicas; na Lei 40/2015, do



1 de outubro, do Réxime Xurídico do Sector Público, e polas demais normas en dereito administrativo aplicables ou, no seu defecto, polas derivadas do dereito privado.

Décimo primeira.- Protección de datos de carácter persoal

As partes asinantes responsabilizaranse de que calquera tratamento de datos persoais que puideran levarse a cabo en virtude do mesmo se realice con absoluto respecto ás normas de seguridade e de conformidade co establecido no Regulamento 2016/679 (UE) Xeral de Protección de datos (en adiante, RXPd), na Lei Orgánica 3/2018, do 5 de decembro, de protección de datos persoais e garantía dos dereitos dixitais (en adiante, LOPdGDD) e demais normativa concordante.

Os datos persoais das persoas físicas asinantes do Convenio serán tratados polos asinantes unicamente para a adecuada formalización e desenvolvemento do mesmo e en base ao disposto no artigo 6.1 b) do RXPd.

Décimo segunda.- Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao CIF que figure como destinatario da notificación (persoa física



ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Décimo terceira.- Vixencia

Este convenio entrará en vigor na data da súa sinatura, e manterá a súa vixencia ata a completa organización e finalización das actividades e a liquidación das obrigas resultantes, rematando en todo caso o 31 de decembro de 2020.

En proba da súa conformidade, as partes asinan este convenio na data da súa sinatura dixital.

Pola Axencia Turismo de Galicia
O presidente

Polo Clúster Turismo de Galicia
O Presidente do CTG

Alfonso Rueda Valenzuela

Cesáreo González Pardal



ANEXO I

Importe	Partida con IVE
Demandas Sectoriais	12.000
Grao de preparación do destino turístico Galicia e propostas/tendencias na xestión de destinos turísticos post-COVID	12.000
Evolución do comportamento e hábitos do consumidor e posicionamento actual de Galicia como destino turístico	12.000
Participación	7.500
Redacción e síntese de propostas, financiamento e fortalecemento de Galicia como destino seguro. Indicadores	15.000
Coordinación e xestión	6.500
TOTAL	65.000

